


von Wulf Wager

Mir kommt d' Galle ruf



Letzsch Woch war i em Krankahaus, weil i Gallastoi ghet han ond mei Arzt gmoint hot, dia Gallablos sott mr rausmacha. Des dät sowieso koi Mensch braucha, weil des no en Evolutionsrescht aus derra Zeit war, wo mir Schwoba no en de Höhla ghaust hend ond bloß äll paar Dag ebbes zom Essa gfanga hend. Also ben i ens Kran-

kahaus ond han mir des Deng rausmacha lassa. Do schneidat se dr vier Löcher en da Bauch, steckat Kamera ond chirugische Inschdrument durch, ond holat des Bläderle mit dene Gallastoi raus. Noch ra halba Stond war alles erledigt. Zwoi Nächt soll e do bleiba, hot dr Doktr gmoint. Aber zu dene zwoi Nächt hend halt au zwoi Däg ghört. I han zwar viel glesa, aber da ganze Dag lesa goht au net. Also han i ondr gfühlte 456 Fernsehprogramm d' Auswahl zur Zertreuung ghet. I ben au em zäppa gar nemme rauskomma - vor lauter Mischd wegdrucka. I han scho Blodra an d' Fenger krieagt. Was e do gsäh han, des war ganz furchtbar. Je flacher dia Bildschirm werdat, desto flacher wird au 's Programm. Do kommt uf alle Sender da ganze Dag so an Jesesmischd, dass grad schad om da Strom ischt. Do kennt mr Energie spara. So an gequirrter Schofscheiß. Do isch mr grad wiedr die frisch entfernte Galle hochkomma. Je später dia Show, desto blöder dia Gäscht.

Bis näggschd Woch

Ihr

Wulf Wager

Alle Kolumna zom Nochlesa

onder: www.woascht.de oder em facebook em Wulf Wager Fanclub